

der czijt, die gesaczt ist, nicht phlichtig sie weder zcu gebenne. Vnd rüret hir, das die weder clagen zcwierleie wederrede sie, ut Instit. de excepcionibus § appellantur. Deszer wederrede ist eczliche also, das sie die clage zcu male zcu storet. Eczliche also, das sie die clage czoget.

Die wedirrede, die die clage zcu male zcu storet, das ist, ab du mich beclaitest vmme czehen margk, vnd ich spreche, ich hette eyns mynen eid darczu gethan. Hir mete zcustore ich dyne clage, Inst. de excepcionibus § eque.

Die andere wedirrede, die die clage czoget, das ist, als du mich schuldigetest vmme czehen margk, vnd ich hette der noch eyn jar tag. Hir mete czogete ich die clage, vnd en vorstõrete die clage nicht, Instit. de excepcionibus l. temporales, et ff. de verborum significacione l. servi. Dis meynt her hir, do her sait: Zcu bescheidener czijt. Ab her sulde sprechen: Manet her on vor der czijt, her en darff es nicht gelden. Beclait her on zcu rechter czijt, so sal her es om zcu hand weder geben.

XXIII

[III 23] Wer herberget ader spiset wissentlichen eynen vorvesten man, her mus dar vmme wetten. En weis hers aber nicht, her entredet das gewette mit syner vnschuld.

Glosa

[III 23] Hir iegen habe ich dicke in gerichte eyn orteil horen luten, das was alsus: Her richter, ich vrage uch, ab on ymand husete ader hegete, ab her nicht gliche schuldig sulde syn. Das vant man vor eyn recht, her were. Das were dar weder, das hir stet: Wer herberget eynen vorvesten man, vnd hilde on als eynen gast, tut hers wissentlichen, das get om an gewette. Wenne syne hegunge ist vorlobet. Der ist gliche schuldig, ut C. qui latrones l. si qui.

En weis hers aber nicht. Tut hers vnwissentlichen, so das her das rechten lichte nicht en wuste, das her lichte wenete, das es wol gethan were, so mus her wetten. Wen das recht sal eyn iczlicher bie not wissen, ut C. de legibus et constitutionibus et edictis l. leges sacratissime, et C. de iuris et facti ignorancia l. constitutiones. Wuste her aber der geschicht nicht, das her voruestet was, so blibet hers ane schaden. Das sait her hir, ut C. de iuris et facti ignorancia l. ^a<error>. / [1rb]

a) erra Hs.